

BOSNA I HERCEGOVINA  
FEDERACIJA BOSNE I HERCEGOVINE  
**VRHOVNI SUD**  
**FEDERACIJE BOSNE I HERCEGOVINE**

Broj: 70 0 U 007609 24 U 2  
Sarajevo, 20.09.2024. godine

Vrhovni sud Federacije Bosne i Hercegovine u Sarajevu, u vijeću za upravne sporove sastavljenom od sudija Bajrović Aide, kao predsjednice vijeća, Vuković Josipa i Babić Stanković Aleksandre, kao članova vijeća, te Hodžić Melise, kao zapisničara, u upravnom sporu tužiteljice P.R. iz Š.B., J. bb, zastupane po punomoćniku Odvjetničkom društvu Paponja & Partneri d.o.o., ul. kralja Tomislava 109, Mostar, protiv akta broj: UP-I-03-41-ZKZ-2837/16 od 08.08.2019. godine, tuženog Federalnog ministarstva za pitanja boraca i invalida odbrambeno-oslobodilačkog rata Sarajevo, u upravnoj stvari kontrole zakonitosti korištenja prava na ličnu invalidninu, na nejavnoj sjednici održanoj dana 20.09.2024. godine, donio je slijedeće:

### **R J E Š E N J E**

Vrhovni sud Federacije Bosne i Hercegovine oglašava se stvarno nenadležnim za postupanje u ovom predmetu.

Cijeli spis se dostavlja na rješavanje Kantonalnom sudu u Širokom Brijegu, kao stvarno i mjesno nadležnom sudu.

### **O b r a z l o Ź e n j e**

Prednik tužiteljice (umrli muž P.Z.) je dana 10.09.2019. godine Vrhovnom sudu Federacije Bosne i Hercegovine podnio tužbu radi poništenja rješenja tuženog Federalnog ministarstva za pitanja boraca i invalida odbrambeno-oslobodilačkog rata Sarajevo broj UP-I-03-41-ZKZ-2837/16 od 08.08.2019. godine. Tim rješenjem ukinuto je konačno rješenje Službe za branitelje Domovinskog rata Općine Široki Brijeg, broj: 12-41-726/05 od 28.07.2005. godine (kojim je umrlom mužu tužiteljice bilo priznato svojstvo ratnog vojnog invalida V grupe sa 70% vojnog invaliditeta), te upravna stvar riješena tako da se umrlom mužu tužiteljice priznaje svojstvo ratnog vojnog invalida VIII grupe sa 40% vojnog invaliditeta po osnovu povređivanja i oboljenja koje se pogoršalo vršeći vojne dužnosti u Oružanim snagama (HVO) i kao takav da ima pravo na ličnu invalidninu u mjesečnom novčanom iznosu od 59,49 KM, kao i ostala prava propisana zakonom, s tim da prava priznata po ovom rješenju pripadaju od 08.08.2019. godine i traju dok postoje zakonom propisani uvjeti za korištenje priznatih prava.

Rješenjem Vrhovnog suda Federacije Bosne i Hercegovine broj: 70 0 U 007609 19 U od 25.02.2021. godine, u predmetnoj upravnoj stvari postupak po podnesenoj tužbi je zbog smrti tužitelja P.Z. prekinut, a u skladu sa odredbom člana 378. stav 1. tačka 1. Zakona o parničnom postupku („Službene novine Federacije Bosne i Hercegovine“, broj: 53/03, 73/05, 19/06 i 98/15) i u vezi sa odredbom člana 55. Zakona o upravnim sporovima („Službene novine Federacije Bosne i Hercegovine“, broj: 9/05), te je pozivom na odredbu člana 381. stav 1.

Zakona o parničnom postupku, određeno da će se prekinuti postupak nastaviti kada nasljednici preuzmu postupak ili kada ih sud, na prijedlog protivne strane pozove da to učine.

Tužiteljica u skladu sa rješenjem o prekidu postupka od 25.02.2021. godine, kao zakonska nasljednica umrlog P.Z. na temelju Rješenja o nasljeđivanju Notara Ankice Primorac iz Širokog Brijega, broj notarskog spisa: UPP 261/2023 od 16.09.2024. godine, je putem punomoćnika dana 05.09.2024. godine Vrhovnom sudu Federacije Bosne i Hercegovine dostavila prijedlog kojim preuzima postupak u svojstvu tužitelj u predmetnoj upravnoj stvari.

Dana 23.12.2021. godine stupio je na pravnu snagu Zakon o izmjenama i dopunama Zakona o provođenju kontrole zakonitosti korištenja prava iz oblasti branilačko-invalidske zaštite (Službene novine F BiH, broj 103/21), kojim je (član 4.) izmijenjen član 7. stav 9. zakona na način da isti glasi: „Protiv rješenja Federalnog ministarstva donesenih u postupku revizije ne može se izjaviti žalba, ali se može pokrenuti upravni spor kod kantonalnog suda nadležnog prema mjestu donošenja rješenja kojim je priznato pravo a koje je bilo predmet kontrole po odredbama ovog zakona“.

Prema članu 17. Zakona o parničnom postupku, koji se primjenjuje shodno odredbama člana 55. Zakona o upravnim sporovima, sud do pravomoćnosti odluke po službenoj dužnosti, pazi na svoju stvarnu nadležnost.

Kako je prema naprijed citiranoj odredbi člana 4. Zakona o izmjenama i dopunama Zakona o provođenju kontrole zakonitosti korištenja prava iz oblasti branilačko-invalidske zaštite došlo do izmjene stvarne nadležnosti Vrhovnog suda Federacije BiH za postupanje po predmetnim tužbama, to je sud shodno članu 17. i članu 67. stav 2. tačka 2. Zakona o parničnom postupku, riješio kao u izreci ovog rješenja.

Zapisničar  
Hodžić Melisa, s.r.

Predsjednik vijeća  
Bajrović Aida, s.r.